






Centimetres

TIPPEN Color Control Patches

© The Tiffen Company, 2007







鶴徵後錄卷第九

與試未用二十八人


王騰蛟字步元浙江錢唐人貢生由兵部尚書江蘇巡撫高其倬薦舉乾隆丁卯順天舉人

先生為介眉侍讀同懷弟工詩詞能文章當其並薦大科人多羨之惜歷遊四方無所遇終身連蹇僅一舉京兆試與梁冲泉少空同榜歿後無子遺著皆散佚梁山舟學士為子言其崖畧如此

潘思光字亞卿福建安溪人廩生由福建巡撫盧倬薦舉乾隆戊辰進士



嘉興李富孫既汴甫輯



詞科掌錄云潘亞卿奉天盧公以第一人薦丁巳歲補試

陳鏞字宗五湖南武陵人貢生由戶部侍郎陳樹萱刑部侍

郎楊超曾交薦舉乾隆戊辰進士改庶吉士

錢載字坤一號蘅石浙江秀水人雍正壬子副貢生由浙江總

督程元章薦舉乾隆壬申進士改庶吉士累官禮部侍郎著有

蘅石齋詩集

先生嘗問業於桑敬甫先生故學有本原早歲中副車一時

名公卿咸相推重已已 詔舉經學吏部侍郎介公福以素

行敦樸究心經史戶部侍郎嵇公璜以爲人醇謹殫心經籍

上章交薦四十後成進士入翰林游擢卿貳屢主試事迄致

仕歸依然一寒素士性樸誠坦率無少掩護人或有過卽加

面斥詩不事雕飾具有真氣溢於言表兼工繪事花石竹木

極疎秀之致遠近皆寶之

先生蘅石齋詩集自序云

世宗憲皇帝詔天下舉博學宏詞之士雍正乙卯夏本縣府申

載於省總督考取以入奏

皇上登極重申 前詔乾隆丙辰中外所薦士雲集京師九月

御試於 保和殿而載卷不可以中選歸而境益困以學侶相

牽復客京師已已

皇上詔天下舉經學之士朝之大臣以載入奏辛未議罷明年

中式順天鄉試 廷試成進士改庶吉士於是載年四十有

五矣官翰林詹事者二十有二年爲侍從者十有六年癸卯

二月蒙 恩予原品休致幸歸田野五六年來僻居窮巷時復讀書病矣憊甚固知無及於自責矣

藤陰雜記云錢少宗伯載雍正壬子中副榜時金檜門總憲客承訂交丙辰大魁宗伯屢試不售日者謂逢申方中年四十五壬申果聯捷出睦朝棟門睦乃總憲辛酉江南所得士也於是執小門生禮維謹自是典文衡陟卿貳七十歸田八十七方卒

蒲褐山房詩話云蘅石襟情蕭曠真率自如乾隆甲戌初夏從金檜門總憲一經齋與余訂交遂成雅契性豪飲嘗借朱竹君學士金輔之殿撰陳伯恭王念孫兩編修過余冬夜消寒卷波浮白必至街鼓三四下時竹君推戴東原經術而蘅

石獨有違言論至學問可否得失處蘅石輒發赤聚訟紛紜及罷酒出門斷斷不已上車復下者數四月苦霜濃風沙蓬勃餘客佇立以俟無不掩口而笑者善鑒別法書名畫望之審其真偽故尤工繪事晚年致仕歸藉以給朝夕乾隆庚戌年八十三上元日猶爲予做黃鶴山樵長林修竹極雨葉風枝之妙詩率然而作信手便成不復深加研鍊殆其鄉李日華姚綬一輩人也

梧門詩話云蘅石侍郎壬申聯捷成進士是年會試在八月香樹先生賀詩云刻成楮葉廿年遲著論韓公伸紙時 朶殿爭看和氏璧瓊筵笑插菊花枝注云今年會試卽廿年前中副榜題也與退之不貳過論題事相類

南野堂筆記云擇石少宗伯詩體以博大爲宗神景開闢不
媿作家鉅手五七言佳處皆清老蒼秀合東坡半山山谷爲
一家

周大樞字元木一字元牧又字爰穆更字園牧號存吾浙江山
陰人生員由浙江總督程元章薦舉乾隆壬申舉人官平湖縣
教諭著有周易井觀居侯堂集存吾春軒詩鈔調香詞

元牧學問浩博才思橫溢已已經學之徵吏部侍郎介福復
以究心經籍尤嫻易學薦舉說易不取宋儒所傳圖位詩文
於蒼莽中自見清勁無愧於古之作者嘗以丙辰同徵二百
六十餘人之詩撰鴻爪錄一時爭傳播之

沈菽林周徵士詩序云周君爰穆窮而能詩見稱於鄉邦乾

隆初元以徵至京師與之交醇雅篤摯一話一言洞見胸臆
其詩不爲藻采浮聲而體靜旨遠悠悠可思蓋善道其性情
而有合於古作者之旨已余與爰穆論詩既有針磁之合誦
其所作輒爲歎賞不置夫爰穆抱窮愁抑鬱之思能不苟同
時俗而爲此大雅不羣之什其人亦卓然有立而非所常得
見者也余能無深服乎哉

詞科掌錄云周元牧詩文高勁秀出力追古則 廷試日瘧
疾綿月未愈手艱於作書多所遺落不得入等幼工詩餘與
秀水萬光泰相友善嘗自序其調香詞及爲萬作樊鄰詞序
風豔不減三唐其詩長於五七古五排七律意欲參取諸家
自成一體雖或未逮而志則遠矣

詞科餘話云元牧與穉威在江東詩社中最稱傑出均列徵書會稽商編修盤寄四律示喜其第三云君家髯客舊清班况有嶽崎老念山風雅一門傳賦詠鳳鸞三島稱疎頑才超金箭東南外詩到韓蘇伯仲間慚愧六鈞弓在手病夫無力未能關元牧亦有次韻四首

隨園詩話云丁巳春予與元木循初同在穉威寓中夜賦聽雨元牧見贈一篇云文章之家無不有袁郎二十膽如斗詞甚奇譎不能備錄壬申歲予病起長安元木再贈七言古詩起句云憶昔相見長安郎志氣如虹挂千里狂飛大句風雨來頭沒酒杯笑不已真乃替予寫照元木 廷試報還果毅公延爲上客每公餘之暇命講通鑑數則亦想見當日雅度

也元木詩最堅瘦獨詠桃花頗婉麗其詩曰寂寂朱塵度歲華又驚春色到桃花五陵游客知何限只有漁人最憶家管仲墓云浪說儒門羞五尺只今江左幾夷吾

蒲褐山房詩話云元木在京師寓虎坊橋小衚衕門有大井老屋三間齋鹽終日予贈以句云小住常依元亮井出遊誰問孝廉船蓋絕實也學博而才長滔滔莽莽動以數百言蓋其時浙中詩人如胡穉威桑岐甫皆門奇騁異故元木亦如之然文從字順自較兩家爲優

梧門詩話云園牧學問淹博與陳星齋杭堇浦齊次風相友善詩工七古洋洋灑灑沈鬱似杜奔放如蘇近體余未多見雨後一作云雨後江邨路新泥屐齒加夕陽明晚稻秋水倒

疎花碧岫披雲出紅樓帶樹斜渺然成獨立歸詠後棲鴉亦是佳構

陸云園牧於詩琢抉爬搔勤無暫休應詞科試不遇境益窮吟益苦年近六十始舉京兆充咸安宮教習敝袍徒步無異編氓生平與胡穉威萬循初董交最深諸君皆貧而在下氣類相感切劘尤至長子朱城次子堅先後皆登賢書能世其業

龔元玠字鳴玉一字琢山號畏齋江西南昌人廩生由光祿寺卿劉吳龍薦舉乾隆甲戌進士官貴州銅仁知縣著有十三經客難

己巳奉詔薦舉經學詞科同徵之士復被薦者二十人畏

齋亦爲江西巡撫阿公思哈所薦其學尤歷祿貫弗非僅爲一家言者

尙廷楓字嶽帥號茶洋江西新建人廩生戶部主事由都察院左副都御史孫國璽薦舉

茶洋曠世軼才於經史諸子靡不博涉旁通下筆雲飛壽捲莫能測其涯淡吾鄉馬墨麟觀察在京師日以茶洋與萬柘坡袁簡齋有三異人之稱五言詩如孤帆秋色斷斜月夜光遲日照雪中樹人居川上山野人無瓦屋春色自柴荆石苔人去積山鳥客來驚獨由春水外笑入暮雲間石白松依寺天清月在山我友欲歸隱結廬在峯陰七言如曉風吹水客磨鏡春日照山僧打包空林古廟忽聞籬落日老僧忘打鐘

三徑綠苔人別處一江紅樹日高時皆語極超妙

詞科掌錄云新建尚嶽師原籍陝西興安以父濬浙江提督
廕任戶部山西司主事詩骨清曠故是逸才

詞科餘話云茶洋有逸才臨川李侍郎亟言於副憲孫公遂
列薦牘有上副憲詩四首

隨園詩話云與余同薦鴻詞者有戶部主事尚廷楓爲人詭
誕不羈忽而結駟連騎忽而布衣藍縷賦詩有奇氣如落花
平地二尺厚芳草如天萬里青月華照樹有烏鵲雲氣上天
如白羊皆警句也

張秋水云嶽師隨父任之浙江游江南與厲樊榭最契有送
行詩云四野夕陽羣鳥散萬山秋草一人歸

峻德姓納蘭氏字克明號慎齋正白旗滿洲人歲貢生戶部筆
帖式由都察院左副都御史孫國璽薦舉著有使秦集

納蘭氏門才最盛 國初容若侍衛以年少雋才與健菴司
寇竹垞太史遊擅詩詞并爲詞寇萊通志室經解慎齋淹雅
好古工吟詠能不媿家風

詞科掌錄云納蘭克明與同官保祿在中皆有詩名南城潘
安禮序其使秦集云覽其感物造端道古吟諷動生千載之
思而風俗政治之大端一篇之中間見側出和載揚王子清
明看花詩者納蘭氏居其五

炙硯瑣談云納蘭峻德詩格幽秀絕類晚唐趙北口云西風
垂柳復垂楊斷盡南來客子腸卻更長堤三十里亂荷殘水

雁聲涼銅雀臺云三臺羅綺土花凝舞袖香銷黯漆燈翠輦
不來環珮冷夜深紅鬼哭西陵感舊云玉臺詩寫蜜香菱鬢
影春生杏葉煙馬首一枝紅照眼傷心事往十三年

稗勺云納蘭戶部慎齋嘗寓盤山天城寺與水月菴僧然西
以詩往還系於小犬之項云相望一峯隔相呼恐不聞寄詩
憑小犬好去度深雲僧答詩有昔有鴻傳信今憑犬寄書句
蓋不知陸機黃耳千歲寶掌白犬故事也但犬寄詩則古未
有者可爲廖融添一詩奴

李鍇字鐵君一字眉山號鷹青山人又號焦明子正黃旗漢軍
人原任官庫筆帖式由宗人府左宗正多羅慎郡王兵部侍郎
鎮國將軍宗室德沛交薦舉著有尙史臧集後集

眉山以華胄之門肆力於古品詣高潔經學之徵工部尙書
趙公宏恩兵部侍郎觀公保以淹通經史交薦詩刻意剗削
擺脫俗蹊尙史以馬氏繹史爲棄木而攤析其文改爲紀傳
體有本紀世家列傳表志諸目其體例準諸史記而排纂之
法則仿路史而小變之

秦樹峯曉集序云山人詩始讀之淵然以古炳然以則浸
淫乎漢魏初盛唐諸家而歸本於少陵其言有物其品亮以
潔其志宏以遠其氣廉以平其語邃以正聲律蓋筌蹄云爾
詞科掌錄云奉天李鐵君先世蜀人故一字眉山家世貴顯
父輝祖累官少司寇又大學士索額圖介婿獨耽清寂隱盤
山鷹青峯下號鷹青山人又號焦明子自爲傳曰焦明子有

靜癖喜行無人徑嘗犯雨雪歷谿谷中獨遊以爲樂蛇虎迹
縱橫不顧也苦嗜茗爲鐵鑄瓦所使奚所至負從之每茶烟
起水石邊樵采者咸知其焦明子也淳郡王爲刊其集口焦
明詩文刪稱爲高寒幽僻博奧岫奇整暇如佩玉鳴琴奔驟
如雲車風馬文真秦漢以上手筆詩非中晚以下格韻視世
之以薦花爲國收以紅粟爲法物者超然遠矣

別裁集詩話云身青係勳臣後當得大官乃偕其配隱於盤
山旣老歲一至京師然一二日卽歸人罕見其面詩古奧峭
削自闢門徑高者胎原杜陵次亦近孟東野

隨園詩話云遼東三老者戴亨字遂堂陳景元字石闢馬大
鉢字雷溪三人皆布衣不仕不與人世交接來往者李鐵君

一人而已鐵君作尙史專摻三代以上事而不知 本朝有
馬驢之釋史亦囿於聞見之一端又云鐵君父爲總督而能
隱居不仕自稱廬青山人有蟪蛄集行世錄其梅花云衆木
正如夢一枝方自春遂令江水上真見獨醒人詠月云清絕
自成照何曾掛樹生有時通夜白一片得秋明遠水若相接
浮雲或並行年年圓便缺誰悟善持盈

長住姓王氏字松儕號蘭谷正白旗包衣漢軍人監生 景陵
八品茶上人由宗人府左宗正多羅慎郡王薦舉後陞內務府
郎中

蘭谷爲大學士查郎阿妹婿詩才清綺與吾鄉祝豫堂舍人
襟情交契有往來投贈之什

詞科餘話云奉天王長住蘭谷世居遵化州馬蘭峪時爲
景陵茶上人秀水祝宣臣奉陪淳郡王謁
陵與之款洽有贈詩

楊芝墅文孫云蘭谷有贈李純九詩云淮海賢聲廿載餘又
從淑問服官初夢回塵世詩情遠心寄雲山宦味疏苔蘚映
階飛雀下芰荷隔水晚風徐高槐蔭滿西華路白首重來檢
簿書饒有韻致

陳景忠字又方號橘洲鑲紅旗漢軍海城人監生由兵部侍郎
鎮國將軍宗室德沛薦舉後官同知

橘洲與兄石閩並力學好古以能詩稱與遼東諸老時相酬
和有李廌青移居詩云千載田盤隱誰期此願違相憐春楚
楚依舊燕飛飛山月來窮巷東風入故衣憐君不得意吾孰
與同歸

隨園詩話云遼東陳石閩弟景鐘字橘洲有夜闌曲云春夜
頻傾金叵羅胡姬按板對筵歌低回笑語牽紅袖如此風光
可奈何

許佩璜字渭符江南江都人監生河南衛輝府管河通判由河
東總督王士俊薦舉後陞知州

渭符幼承母教工詩詞爲當時所推吾鄉錢文端公稱其詩
音節清越有漢魏餘響

沈文慤許雙渠抱山吟序云吾友許子雙渠少承家學誦揚
清芬又研窮經術以經世務及出而從政綜理民社分治河

渠肆應孔迫矣究無一日或廢乎探原竟委之學而又以其
餘事兼及於詩詩固陶冶性靈之一也然其爲詩必蒐據六
籍討論子史卽下而說部類書亦廣爲徵引以供驅遣之用
歲乙卯雙渠應博學鴻詞詔來遊京師余因與定交見其
捆載典籍鉤元纂要余得常與借書而雙渠有未經流覽者
亦廣爲乞假鈔謄不厭惟時名流咸集文酒會合雙渠詩成
墨瀋未乾頃刻傳寫都下識者並推爲學人之詩而非藉口
白戰以自詡爲羌無故實者也後風流雲散天各一方余旣
日就頽廢而雙渠屢任繁劇於督菱堦宅鴻雁時一一見諸
於詩與元道州春陵行示官吏諸作不襲面目而得其神理
老杜所謂乃知正人意不苟飛長纓者洵於今日見之也

詞科掌錄云許渭符平越王公所薦旋升同知先試母夫人
徐爲漕帥清獻公女有才學

詞科餘話云渭符以開封通守奉 詔之京

特旨先試卽歸汴州

隨園詩話云比來閨秀能詩者以許太夫人爲第一其長嗣
佩璜與余同徵鴻博讀太夫人綠淨軒自壽云自分青裙終
老婦濫叨 紫綵拜鄉君元旦云剩有濕薪同爆竹也將紅
紙寫宜春喜雨云愆期休割乖龍耳破塊粗安野老心不爲
清涼宜翠簾可知點滴盡黃金皆佳句也夫人爲徐清獻公
季女名德音字淑則王太倉相公揆出清獻之門其視學浙
江也遣人告墓夫人有句云魚菽薦羹惟弱女松楸酌酒屬

門人又云溧陽公由總督入省兼領六卿許刺史佩璜有句
云三朝元老裴中令白歲詩篇衛武公余有句云南宮六一
先生座北面三千弟子行俱爲公許可

施念曾字得仍一字得齋又號蕪齋江南宣城人拔貢生廣東
興寧知縣由廣東巡撫楊永斌薦舉後陞河南禹州知州未赴
卒著有樂心集

丙辰詞科之徵有祖父以己未鴻博起家而其孫復膺薦辟
者三人吾鄉朱竹垞太史孫稻孫華亭王相國文恭公孫祖
庚及愚山侍讀孫念曾兩世俱應大科之 召雖不得中選
一時以爲榮亦可見淵源之有自矣

鮑琦亭集云蕪齋爲愚山先生曾孫學有宗傳以拔萃入成

均奉大對 命往廣東揚歷知繁縣以課最得 召見近移
浙江再試二大縣前後十五年粵中巨豪憑其城社君杖而
錮之浙東奸民煽動君以靜填之而自息其才諳有過人者
其令新會嘗葺白沙先生祠姚江爲黃忠端公贖祭田皆非
近世從吏所有也所至聚書雖在官衙不廢稽古嘗繙閱至
夜分風吹其燈燕及長篝左頰亦燦次日予適過其署相視
而笑後由德清遷河南之禹州尚未赴爲前縣尉所誣解官
聽勘蕪齋平生自好驟遭毒噬不勝其憤大吏頗知之欲亟
白其獄而已病不可爲遂卒于杭州之寓寮夫以蕪齋之勤
慎和平愛民下士而竟橫罹憂患年甫踰四十無子身後大
吏窮竟其事皆無有嗣反坐以去然歸裝蕭然斥賣及書卷

平時賓客交游無至者惟吾友杭堇浦不替歲寒之誼抵家
太宜人亦遂以哭子死人倫之慘備矣

詞科掌錄云施得仍昆明楊公所薦丁巳補試令祖愚山先
生己未中詞科詩名海內得仍守其家法格律清迥恩促別
去未暇鈔其集

李旭齋云蘂齋詩學精深溫栗不徇平時嘗與同郡張汝霖
輯宛雅三編以續梅鼎祚蔡綦春初二編之後復補輯唐宋
以來至 國朝共得二百七十九人

王作人字育才浙江錢唐人生員諲敘原任貴州黔陽知縣由
太僕寺卿蔣漣薦舉

詞科掌錄云王育才工書法初以諸生直 武英殿議敘官

德清教諭例當改縣丞

憲皇帝特旨授黔陽令以事落職復以司臬王柔舉起復候補
今署直隸新河令育才詩不多作亦不肯輕以示人予五弟
爲愛婿屢索不得僅見其黔江秋之一篇

王起鵬字翹如浙江歸安人拔貢生陝西青澗知縣由陝西巡
撫碩色薦舉後陞綏德州知州著有雞堂詩鈔

翹如有才學雍正己酉拔萃入成均 廷試以知縣用分發
陝西任青澗令巡撫碩公深加獎異鴻詞試罷擢綏德州牧
未之官而卒

詞科掌錄云王翹如署青澗令雍正戊戌予下第將歸時翹
如方以 廷試來京師朝夕過從有和全謝山韻送予詩

勞孝與字巨峯一字阮齋廣東南海人拔貢生由廣東巡撫楊永斌薦舉後官貴州鎮遠知縣著有春秋詩話

阮齋才氣豪放學亦博瞻所著春秋詩話專取左氏之言詩者一曰賦詩如重耳賦河水秦穆賦六月之類二曰解詩如卻至解兔置穆叔解三夏及文王鹿鳴之類三曰引詩如鄭公子忽引自求多福陳敬仲引翹翹車乘之類四月拾詩乃古詩佚句左氏拾而出之五曰評詩爲吳公子觀樂一篇每條後各以所見附著之

詞科掌錄云勞孝與與里人羅天尺蘇珥齊名天尺有瘦量山房詩勞爲之序云余嘗好浪遊妄欲跡徧海內與天下士交髮未燥卽從先君薄遊瓊南甫弱冠杖策踰嶺渡河倘佯

江淮間氣愈豪則益自喜而猶以求得交當世鉅公偉人爲歉未幾鱗門夫子視學吾粵以古學爲斯文倡吾黨二三子若羅子履先陳子海六何子贊調陳子聖叔蘇子瑞一輩皆從之遊余亦勉自淬厲詎謂見後旋以憂告今年夏有省志之役與履先喪事於粵秀山堂討論軼事發爲詩歌更出其近草示余回憶數年前與二三子酣歌縱論時曾不轉盼而風流雲散聖取薄宦江浙贊調雖捷去將卑棲桂林若海六瑞一輩俱不得志散居鄉塾而余與履先棲遲省會以手晚供人役抑獨何哉

易宗瀛字公仙湖南湘鄉人貢生試用浙江曹娥場鹽場大使由宗人府左宗正多羅慎郡王薦舉

公仙姿制明敏詞藻翩翩遊京師慎郡王愛其才嘗延之於
邸詞科之徵因首疏薦之

詞科掌錄云易公仙弟宗堯兄弟皆遊朱邸監生祖栻公仙
子也工畫

御製集中有題其墨竹詩

王藻字載揚號榜泝江南吳江人監生由都察院左副都御史
孫國璽薦舉後官國子監學正著有鸚鵡湖莊集

丙辰 詔舉鴻博臨川李穉堂先生時爲少司農已薦六人
格於例限因取諸所知者名姓於 朝房中廣託九卿載揚
尙未有薦主乃交門下士孫副憲薦之孫有雉色先生大怒
責其蔽賢孫不得已長跪謝罪允薦乃已次日其事

上聞以浮躁失大臣體鑄二級若先生者真以愛才爲性命之
事矣

劉海峯王載揚詩集序云王君載揚不屑爲科舉之學一意
肆力於歌詩而性又疎放不能深自策厲以趨於仕進之途
家本貧衣食不足以贍而願嘗好載籍筆墨彛器雕刻玩弄
之具星羅於几席以自爲娛樂其於書必求其刻之最工者
而錦函以盛之至於惡衣糲食多寒衣敝袍人多笑之而不
悔昔米芾作唐人冠服違時異俗人謂之顛載揚亦似顛倪
瓚構雲林之堂置古鼎尊罍玉器書畫其中人謂之迂載揚
亦似迂而載揚之窮則又昔之顛與迂所不及者宜其詩之
每進而益上也載揚之於詩無所不窺而其雕鏤刻畫之巧

未嘗不與其玩弄之具同如珠如玉如時花如蜀錦之新濯
如藻火粉米之煌煌蓋其工如此然則載揚其將益窮窮且
無有已時哉與余同寓居少宰吳公之家知之最深於是爲
之敘

詞科掌錄云王載揚詩學辨香漁洋雍正壬子清明日徧邀
輦轂諸名公集宛平相國怡園各賦七言古詩一首追和
宋蘇子瞻明楊孟載兩先生作凡二十餘人載揚爲之倡
別裁集詩話云載揚少工詩人無知者歸安沈翰翁編修見
而賞之編告詩壇名遂著

隨園詩話云丙辰徵士王載揚販米爲業偶題桃源圖云相
看何物同塵世只有秦時月在天以此受知於沈翰翁先生

四處掄揚遂棄業讀書薦舉詞科報罷往來揚州與詩人結
社吟詠貌瓊瘦急遽小聲音好蓄宋板書青田石印章有友
借觀誤墮地碎載揚垂泣三日其風趣如此讀梅村集云百
首淋浪長慶體一生慚愧義熙民剪柳云大抵端相求入畫
最難割愛似刪詩又云王載揚接家信知兩子孿生喜賦詩
以寄云可無致語來清照會有明妝避伯喈用典切而雅又
云載揚吟詩以對仗爲工有句云百五正逢寒食節十千誰
醉美人家愛余滕王閣詩阿房有焦土玉樓無故釘一聯湖
州徐階五先生贈沈菜園詩云詩派同初白官情共軟紅以
沈乃初白先生外孫故也王亦愛而時時誦之
松陵詩徵云吳興沈太史翰翁阻風鶯脰湖求可與言詩者

衆以梅泚對太史訪之一見歎爲異才招之主其家由是學
益進而名日起後膺鴻博之薦至京師每名流會合分題角
韻梅泚詩出輒壓倒儕輩晚寓維揚咸奉爲壇坫歿後爲板
行其集云

朱稻孫字稼翁一字芋陂晚號娛邨浙江秀水人貢生考授州
判由詹事府詹事王奕清薦舉著有六峯閣稿

先生爲竹垞太史孫幼承祖父之教胚胎濡染得其家法且
暴書亭藏書具在恣意瀏覽不假外求嘗與里中芷園菜畦
柘南諸同輩爲詩課拈題分韻竹垞太史親爲點定每成卽
寫長箋付梓先生詩格道上楷法在褚歐間尤工分隸晚景
益窮稍藉以自給詞科之辟柘南翁州縣亦以名上格於省

試皆爲後來之秀吾里自先國博霽巖公以詩學爲橋李倡
皇甫子循謂足與空同于鱗鼎峙至先徵士秋錦公兄弟及
竹垞太史當谷藍村兩處士往還酬倡殆無虛日故百年以
來騷雅遺風猶有存者

盛柚堂娛村行畧云先生自幼天資超妙父上舍公多病不
督以章句之學自能以詩文翰墨世其家困於場屋太倉王
相國揆爲春秋館總裁引爲助因挾其家藏二百七十餘家
之書以備纂修所得館俸大半供朋友之費不留餘金纂成
例得州倅先生赴友人李崧潤之難於關中事平而還選期
已過或云銓曹吏可商也不聽終不得選鴻詞試罷穆堂李
公薦修三禮於朝有阻之者事遂寢性剛介不容物一言

非禮雖公卿滿座必慷慨義形於色因此亦不諧於俗生平足跡半天下晚年家居追憶舊遊作紀行絕句二卷擬古樂府三卷又訂定羅浮蝴蝶詩二卷昔竹垞檢討自嶺南攜歸羅浮蝴蝶與里中人爲蝴蝶詩會至是羅浮蝴蝶忽見於暴書亭南深樹中先生首步檢討近體四首原韻爲倡和者亦數十人爲後蝴蝶詩會所刻六峯閣詩皆少年之作又有續彙十餘卷先生三世以能書名而先生書法不由家學初從汪編修士鉉問津後自取柳誠懸米南宮書晨夕撫之遂自成一家小楷尤精

顧玉停題娛村詩稿云竹垞先生藏書冠海內多祕木人所未見著述播人口而經義三百卷尙未行世余生恨不得侍

先生而壯歲獲交娛村娛村瓌偉男子也擅詞章妙言語尤工八分小篆顧數奇一無所過應舉則困場屋嘗試京兆抄檢嚴監者未耶也娛村坦其腹自如瓠鼓之曰此中大有夾帶耶笑頷之衆皆曰屬歎爲神雋然斥落如故修書則困殿館初與余同被薦校讐春秋繼從事子史精華旋給札武英最後余隨 闕熱河纂中和樂府欲引娛村不果就殿館成勞竟委逝波乾隆初以鴻博徵不得當薦修三禮又或尼之復數年依然故娛村也忽一日見訪蓋不相見者幾二十年而各已老矣訊藏書無恙乎曰吾護之不啻頭目割髓也經義開雕乎曰棗木半輟矣有力者請繼或欲竄改以爲己名因拒弗與也乃出囊中擬古樂府擬步兵詠懷效唐

人詠物洎紀遊懷古合五百六十餘篇余卒讀喟然曰嗟乎天之厄娛村何其甚歟雖然必有說也夫人處富貴之境而克保其先人之手澤此中材子孫優爲之惟其畢生潦倒衣食於奔走而琅函寶笈什襲扃固豈不難哉又使娛村委質通籍身非已有則富不在詩卷卽有所作以鳴得意應不足爲娛村貴也且安見富與貴者所享之爲愈耶天之待娛村孰厚孰薄不俟知者能辨之矣

詞科掌錄云朱稼翁竹垞檢討之孫文益上舍之子少遊京師太倉相公薦修春秋故與宮詹有舊遂舉之

詞科餘話云稼翁罷後踰年由潞河歸時錢唐汪沅秀水萬光泰皆館於查氏爲設宴水西莊限豪寒二韻送之

蒲褐山房詩話云稼翁少孤其祖撫之漁洋題小長蘆卷所謂桐孫稻孫者是也稼翁以名人之後所至人傾慕之乙亥丙子間年近七十游揚州爲盧雅雨運使上客因出其祖所撰經義考後半未刻者雅雨爲刻其全其後開四庫館詔求遺書得以全帙獻於朝

上題詩冠首由是流傳海內蓋可謂能守先澤者矣晚年貧不能支暴書亭藏書八萬卷漸至散佚而已之所作亦久不傳余與其孫伯承爲鄉試同年又在揚州同寓梅花亭數月故得見其詩張匠門序所云始則氣猛而格上後則境觸而情遙殆不虛也

梅里詩話云徵君門第旣高學問亦富性殊嚴冷遇遂屯遭

曾賦詞科一入經局與修浙江通志卒成經義遺書身雖不
達名重藝林六峯閣乃其少壯所作至老篇章尙未付棗梨
戴松門光曾云曾大父笑嶠公暨族祖坤釜公皆受業於竹
垞太史與西陵朝夕討論酬倡最多芋陂後起能繼家學與
沈菜畦王上濤輩同結吟社太史分題限韻有牡丹橋李釣
竿荷葉諸題目詩成太史評定甲乙長箋短簡遠近傳鈔亦
爲後來騷壇盛事

程川字廊渠號春曇浙江錢唐人拔貢生由浙江總督程元章
薦舉後官縣丞著有朱子五經語類運木集

先生志行端慤詞華敏贍下筆千言立就當時有才子之稱
家明經循五族祖爲其女夫著述多散軼五經語類乃肄業
敷文講院時所編後官二尹有解木之役故其詩卽以運木
名也

詞科掌錄云程廊渠籍本歙縣來家於杭纂輯有朱子五經
語類及五經文類

易宗浚字公申湖南湘鄉人監生候選縣丞由湖南巡撫鍾保
薦舉

公申性至孝居母喪廬於墓側枕蓐浦太史贈詩云心目雙
瞿劇可憐聖廬土席靜相便七篇禮服無人讀獨向空山臥
四年尤窳於經所著七政文定三江九河諸論實能貫串羣
言而折衷至當與兄公仙在朱邸並擅機雲之譽

鄧士錦字太初江西南城人廩生保舉廣東瓊州府額外教授

由兵部尚書甘汝來薦舉著有來園集

先生以雍正丙午保舉孝廉甚負詩名如登上封寺云僧房

聽落葉客夢到孤松病中云老知秋信早病覺道心長客黎

川云纔逢三月暮又逐一帆歸夜坐東立夫云往事悔從孤

榻得還家夢向隔年多俱是性靈語

詞科掌錄云鄧太初以康生保舉孝廉任瓊州府額外教授

與同縣潘安禮立夫倡酬最多

黃天策字一峯號香山江西信豐人生員由江西巡撫常安薦

舉乾隆庚申拔貢生官教諭

一峯以諸生應薦試罷尋以選貢入成均後官教諭詩亦清

雅可誦盛劍山有詩寄之云結屋香山下奇峯九十九中有

一峯高勢與華衡醜鸞鶴度遙音時時落虛廓

閻式鑛字 河南祥符人孟津縣教諭出河東總督王士俊

薦舉

朱超字 河南祥符人濬縣教諭出河東總督王士俊薦舉

江其龍字若度江南桐城人生員山安徽巡撫趙國麟薦舉後

選江寧府訓導

先生與劉海峯並為古文學得望溪先生家法尤熟於諸史

能見本原不僅涉獵其詞藻

劉海峯江若度文序云余同里江君若度幼即穎異好讀書

其為人質慤其學無所不窺其文章湛深而有本然困不得

志年四十五始得除江寧府學訓導未適官遽遭父喪遭疾

而卒嗚呼謂天之無意邪荒鄉僻處胡為而有斯人也謂天有意以生之矣年不及中壽位止於學博而又不得一日之官以歿此何為者邪友人方君巨川求得其平生遺稿鏤版以行於世四方之知江君與不知江君者因其文以考其實而江君之懷抱可一寓目得之江君於是為不死矣

詞科掌錄云江若度三禮兩漢書皆有論糾注家之繆

李灝字柱文江西南豐人生員山江西巡撫常安薦舉後官永寧縣訓導著有易範同宗錄問菴堂集

柱文學問淹洽終不得志于有司後以歲貢入成均司訓永寧未幾病卒

周暉剛煒云柱文易範同宗錄取劉歆河圖洛書相為經緯

之義以易與洪範合而一之卷首自署曰南豐前有雍正

未自序又自署曰嘉禾李所未詳

沈彤字冠雲號果堂江南吳江人廩生由內閣學士吳家驥薦舉後議敘九品官著有周官祿用考羣經小疏果堂雜著氣穴考畧內經本論果堂集

吳江沈氏在明中葉有二光祿以直臣稱甲申後有以兄弟殉國難者果堂為義門先生弟子博究典籍精於考據務求古人之異同以折衷至當其於周官禮用力尤深同時如陳少章輩有所不逮集中多訂正經學文字雖不尚詞華而援證精密頗有羽翼傳注之功

鮑琦亭集云果堂為人醇篤盡洗中吳名士之習讀書以窮

經為事實穿前人之異同而求其至是其為文章不務辭華
獨抒心得顧閻淡自修世無知之者而果堂亦不甚求知於
世應薦入京方侍郎望溪李侍郎穆堂皆稱之生平有所述
作最矜慎不輕下筆幾幾有合豪腐頽之風予以為非場屋
之材果以奏賦至夜半不及成詩而出遂南歸兀兀著書予
往來江淮之上道出中吳必造訪即出所著傾倒就予互相
證明

天子求明經之士予以為果堂足副其選而竟未有薦之待
詔公車門下者寒羶一席泊如也

沈文愨果堂傳畧云君總角能文有聲庠序屢入棘闈不售
舉鴻詞 召試保和殿不遇薦修一統志三禮書成授九品


官不就以諸生終性孝友年逾成童教課生徒供潔自養親
沒哀痛嘔血數斗三年中不茹葷不內寢朝夕奠必哭遠近
嘆息謂居喪者僅見少請業何侍讀義門繼遊儀封張清恪
江陰楊文定之門中歲善方開學望溪商訂三禮書疏往
辨論精核李侍郎穆堂折節定交阿尚書南邨特延訓其子
君胚胎前光加師友之益沈酣典籍故發而為文深厚古質
吳中言古文者必屈指君慨自古文之敝尚法律者求工於
波瀾意度而根柢無存宗考據者羅列故實而性靈不屬君
本之乎六經斟酌乎唐宋大家專精殫思窮年繼晷成一家
言以期不朽卒後門人私謚文孝先生
詞科掌錄云沈冠雲潛心經學長於古文拙於有韻之辭不

終試事

松陵詩徵云果堂徵君慨然以古學自任六經為根柢唐宋大家為準則專精殫思篤嗜不倦務成一家言今讀其文法律謹嚴氣味樸茂而考論諸作尤能援經据疏別是非而歸於至常洵吾邑四十年來一作乎詩非其心力所聚然尚氣骨遠浮靡望而知為有本之言

張叔未廷濟云果堂篤古窮經尤精三禮方望溪先生稱其能守樸學不事浮藻以周禮司祿經亡諸家疑公田不足以供官祿因為之例推曲證以補其闕為周官祿田考又取書之二典禹貢春秋之左傳儀禮之士冠士昏及喪服士喪等篇各舉其微文佚義以疏證之為三經小疏皆非博考精思得其源委者不能至此

鶴徵後錄卷第九



同里張昌齡校

鶴徵後錄卷第十

嘉興李富孫既汴甫輯

與試未用三十三人

陸祖錫字念劬浙江平湖人雍正己酉拔貢生由兵部尚書直隸總督李衛內閣學士陝西學政王蘭生交薦舉著有松鱗集
 念劬性敏異童年能詩文即為前輩所激賞書摹褚永興駢體入玉溪生之室以選貢考取教習館錢太傅文端公一見契愛之後視學畿輔招入幕中 召試放歸未幾即卒

張浦山強恕齋文集云徵士少孤力學學使王公振聲深賞之拔貢入成均王公視學陝西挈之行旋入錢香樹幕薦舉
 鴻博九月 廷試報罷裁書即附徵士與香樹以余長女妻

之徵士古文尤長駢體入唐人勝處詩宗選今律類玉溪與
兄畏蒼人稱二陸一日忽展參同契有悟卽閉閣端坐八閱
月而卒臨卒語妻曰毋卽蓋棺旬餘妻以指揉其額肌猶動
皆異之

俞雲莊寶華云念劬少孤母林授以經書過目不忘詩文數
千言立就尤擅小楷得河東家法梁文莊相國贈句新樣從
君擅柳家是也

龔正字  江西南昌人雍正己酉拔貢生由光祿寺卿劉吳
龍薦舉

劉大司寇紹聞與先生爲鄉先達素重其才盛爲推挹故特
疏薦之

顏懋倫字樂清山東曲阜人雍正己酉拔貢生由山東巡撫岳
濬薦舉

先生爲復聖後裔博雅能文酷嗜金石夏商以來彝敦卣
諸奇器收藏甚富一時名公卿莫不以得觀爲幸

邊連寶字趙珍一字肇畛直隸任邱人雍正乙卯拔貢生由兵
部尙書直隸總督李衛薦舉著有隨園詩集

肇畛學問淹貫爲吾鄉錢文端公所知己巳文端時爲少司
寇卽以沈潛經學薦之香樹齋集中有任邱代柬邊鴻博句
云好賣文園賦曾懷光範書隨園詩集末附錄禪家公案頌
一卷則其晚年頗耽禪悅也

詞科掌錄云邊趙珍研辨經史篤學不倦北方學者未能或

之先也

邵昂霄字麗寰一字子政號景甫浙江餘姚人雍正乙卯拔貢生由浙江總督程元章薦舉著有萬青樓圖編萬青樓橐

子政精於天文算法萬青樓圖編十六卷專論天文算數之術分十有四目皆援引漢晉以來天官家言及歐羅巴之說各附以己見其於推測之法頗爲精密所著詩文身後俱散佚今所存僅殘編一卷而已

鮎琦亭集云姚江邵子景亦詞科同籍也獨精歷算之術嘗欲序其書諾之而未果子景卒欲卽家抄其書亦未能也隨園詩話云余乙卯科試考列前茅其時在帥學使幕中閱卷者邵君昂霄也相遇湖上有所贈云韻到梅花清有骨軟

於楊柳怯當風余有知己之感故至今誦之

詞科掌錄云邵子政長於天文歷算著論甚多省試洪範五行聯珠獲雋者八人獨子政作爲輿衍

張南臬姚江詩存云西人測算之法本於周髀自中土失其傳西人改易名目以衍其術世遂奉爲絕學子政通中西之術推策布算細析毫芒手製儀象西人見者咸服其精巧

饒允坡字右蘇號介岡江西進賢人雍正乙卯拔貢生由福建學政周學健薦舉著有近詩代鈔

介岡詩頗清綺同輩咸爲難服有詠苔云杖履不到處幽人一片心平生依水石多是伴蟲吟雨細連階積秋空覆葉深柴門無客掩寂莫到而今

詞科掌錄云饒右蘇爲周勿逸先生所薦嘗攜其集至京師
山陰周元牧亟稱之歸里後不可得見矣從其鄉人錄得無
題詩二首非其至者

劉五教字

山西臨縣人雍正乙卯拔貢生由都察院左都

御史孫嘉淦薦舉

毛一聰字天選湖北東湖人雍正乙卯拔貢生由兵部侍郎署

湖北巡撫吳應棻薦舉

李光國字定齋江南興化人拔貢生由詹事府詹事覺羅吳拜
薦舉

定齋涉獵諸史洞悉本末著有詠史詩品騭是非獨抒己見
能得古人真面目非牽於往昔之說倚於一人之私者

車文字彬若河南太康人拔貢生由都察院左都御史孫嘉淦
薦舉

詞科掌錄云車彬若深於經術五經皆有論著嘗爲井田

圖論古今溝洫之制甚備洵中州之翹楚也聲律本非所長

廷試遭斥落士論惜之

陳世龍字

湖南祁陽人拔貢生由湖南巡撫鍾保薦舉

張廷奏字

山西榆次人拔貢生由山西巡撫覺羅石麟薦

舉

黑瑀姓葉赫覺羅氏字石夫正紅旗滿洲人歲貢生由禮部侍

郎徐元夢薦舉

石夫文才秀綺詩格蕭澹秋興云西風應是徧天涯開滿池

塘白藕花有意不關沙上鷺傷心難訴樹間雅醉鄉但可干
杯盡鏡影還驚兩鬢華老景那堪對蕭瑟平生回首事空嗟
詞科掌錄云黑瑤石夫葉河人家居教授雅有儒風

陸桂馨字元莠號馥園江南震澤人歲貢生由江蘇學政張廷
璠薦舉後官丹陽縣訓導

馥園爲孝廉方濤子少負才譽鄂文端公任江蘇藩使時以
詩賦試士通省得五十二人馥園亦與其列詩說理而不近
腐異於白沙定山一派

陳一策字爾忱福建晉江人歲貢生由福建巡撫盧倬薦舉著
有香雪齋集

爾忱爲明相國洪謐之曾孫達於經術洪範說一篇以九疇
並非洛書孔安國劉歆班固之言皆臆見穿鑿斥爲異說其
論九疇次第聯絡通貫莫非天人至理洵能舉諸儒之說而
一洗之

吳張元字萬長江南吳江人優貢生由兵部尙書兩江總督趙
宏恩薦舉

萬長學頗淹雅名著江南北以優行貢成均一召試後卒無
所遇今訪其里人後嗣凋零遺著亦俱散佚矣

邱迴字爾求江南山陽人貢生由兵部侍郎署江蘇巡撫顧琮
薦舉著有雜錄筆記翼堂詩集

先生季父爲西軒洗馬以己未鴻博起家與兄曙戒早有淮
南二邱之目先生幼承庭訓又得同里張虞山劉水心諸宿

老送館於家目染耳濡見聞殫洽長游漁洋鈍翁竹垞之門
學益深邃年幾七旬應薦赴都此亦馬伏波自忘其老也

詞科掌錄云邱爾求侍講曙戒先生之子年近七十試卷塗
抹過多爲考官所糾置劣等歸以詩自娛有才子曰謹曰桂
柱己未庶常刻其詠物詩數十篇

李引樹云爾求垂老應薦不得用家居桐園積書數萬卷寢
饋其中素長於詩自漢魏六朝及唐宋元明諸大家皆能窮
其旨趣故其所作本之性情幹以風骨藁中哭母懷兄等詩
尤併惻動人

趙昱字功干原名殿昂號谷林浙江仁和人貢生由戶部侍郎
李紱薦舉著有愛日堂集

谷林父東白先生學爲經師三主縣教谷林少稟庭聞內行
醇備問學淵懿母夫人朱氏爲和忠敏公外孫女忠敏子班
孫以事謫瀋陽少婦家居因撫爲女東白先生猶及見曠園
東書堂之籤軸谷林兄弟刻意讀書力購手鈔小山堂插架
之富遂爲海內所推同學之士讀書其家無不解衣推食以
鼓舞之子一清字誠夫能昌其家學

杭董浦趙谷林愛日堂彙序云余少時銳意科舉之學不得
爲詩後交於趙氏谷林昆季谷林有園亭甲於通邑其時沈
介庭符藥林兩詩人皆主其家嘗所往來吳明經繡谷厲孝
廉樊榭及余三人霜宵雪晝時過三林吟屋效劉白之倡酬
鬪孟韓之聯句余乃稍稍自見谷林結體清醇口無凡語余

望之若寥天之鶴戲海之鷗而不敢狎也既而藥林意林應
京兆試余亦疲於續食个庭繡谷皆歸道山風流雲散已如
昔夢谷林應詞科北上浮沈人海淹忽三年風塵委頓意不
自聊藉雕鐫五七字以遣日余與句甫全吉士謝山在詞館
吳通守東壁以與修三禮留京師每會合必有詩未幾谷林
折閱而歸余落莫子居方藉谷林以附庸風雅天不慈遺又
弱一个謂之何哉嗣子誠夫編其遺詩一十六卷請余序之
顧望蒼茫曩時推襟送抱諸宿老無一在者卽欲辭讓而不
可得淒然攬筆不禁涕泗之橫集也

全謝山愛日堂吟稿序云予與谷林定交且二十年江湖之
郵寄京洛之追尋家園之止宿分題刻燭良亦多矣及下世
取其集讀之其氣穆然以清其神油然以瑩其取材浩乎莫
窮其町其別裁蓋非一師一家之可名也詩固三百篇之遺
苟其無與於人倫之旨雖百計求工不過爲世俗之詩谷林
事親以孝兄弟以友恭御下以慈接友朋親戚以厚可謂得
溫柔敦厚之教者矣時與命乖徵車之役不得待詔承明
未央之廷臨川詹事將處以三禮書局谷林睠懷寢門拂衣
竟返晚年稍爲客所負家事漸絀顧怡然不以挂胸日益聚
書矻矻所居小山堂池館之勝甲於錢唐竟日游息其間巖
壑之流止花草之苑枯澄觀默驗不必遠窮屐齒而化機已
畢具於胸中然則谷林之詩之日進而上蓋有由然而區區
蒼萃之富澄汰之嚴淵源之邃與夫諸先生之所夸爲祕傳

者猶其末焉者也

詞科掌錄云趙功干以臨川李公與其從兄鐵巖同官少司農聞其才且賢薦之功干雅詠溫恭築春草園有池館之勝異本書近數萬卷與同里沈嘉轍樂城吳焯尺鳧陳芝蔚九符曾幼魯厲鶚太鴻及弟信意林摛集南渡遺事系以斷句名南宋雜事刊行之盛為海內所稱說

詞科餘話云癸丑春余以禮闈被放尚客京邸既奉明詔貽書趙氏昆弟及谷林令子誠夫促其努力清時潤色鴻業三趙皆有詩寄余又云功干罷後羈京師復五年集其詩名秋芙蓉吟橐錢唐鄭侍讀有詩題其後

朱青湖彭云谷林與弟信同舉鴻博報罷歸讀書自娛築春草園壘石疏泉有池館之勝堂名小山藏書數萬卷谷林之好書也每聞一異書神飛色動不致之不止其所蓄書連茵接屋遂為浙東西文獻大宗性又好客花晨月夕時招吟侶方樸為作倡酬題詞曰詩人若張東亭沈樂城陳蔚九符幼魯施靜巖張繼青葦麋至則修平原十日故事有斯會作筆語之妙庾蘭成所謂可使小山承蓋者也卒後數十年間小山堂藏書俱已散佚人咸惜之

沈炳震字寅馭號東甫浙江歸安人貢生由詹事府詹事王奕清薦舉著有九經辨字瀆蒙什一史四譜井魚聽編新舊唐書合抄增默齋集

沈氏世居歸安之竹墩自明時恭靖襄敏父子二尚書稱名

卿 本朝閣學宮坊兄弟父子祖孫稱名侍從而尤以風雅
領袞東南雙溪倡和之盛一時罕比讀其詩足以想見其門
材東甫兄弟三人篤志讀書貫穿今古與弟幼牧並膺詞科
之薦然者年宿學終不得一當而抑鬱以歿亦可慨也已
沈文憲東甫傳畧云東甫少歲即淬厲於學籍學宮後日有
名省試八不遇遂謝舉子業專攻古學於經史子集多丹黃
鉤纂攷訂博辨而新舊唐書合鈔尤生平注力積十數寒暑
乃成雍正十三年 詔舉博學鴻詞之士大吏交章薦眾論
一辭若此科為東甫開者 召試殿廷仍不遇浩然歸歸二
年以歲貢士卒嘉禾錢少司寇陳羣同學友也見唐書合抄
鄭曰此為有用書遂攜入都陳奏有

旨付詞館潛適分校唐書援據議論之粹精者入考證中

旨以為允彙刻內府頒布天下東甫鬱于生前榮於身後士論
重之東甫性仁孝敬愛昆弟待友以誠綜其行誼俱能不媿
古人者詩初學王右丞柳儀曹中年出入於東坡山谷後流
衍於石湖放翁然營心編纂不欲以韻語自鳴也

錢文端香樹齋集云歲在庚戌與茗上沈東甫遇於京師宣
武坊吳侍御齋中出所纂新舊唐書合鈔二百六十餘卷及
雜著十數卷讀之驚歎曰此今日之王贊善馬鄱陽也後客
晉水予亦祇役兩河昨歲春方裁薦牘卒遽私艱倉遽還京
師宮詹王先生自塞外歸慰予於苦次問交遊中有醇謹強
記者因具以告明日宮詹舉以應 詔雖遇合遲速有數存

焉而宮詹虛公愛才不讓賀季真矣

鮑琦亭集云東甫篤志古學窮年著書其最精者新舊唐書合抄折衷二史之異同而審定之而莫善於宰相世系表之正譌方鎮表之補列拜罷承襲諸節目是皆予讀唐書時有志爲之而未能者九經辨字則小學之膏粱也讀史四譜則三通之羽翼也唐詩金粉等書則亦騷人之鼓吹也予皆嘗讀之歎其不徒博而且精也然所著祇堪自得不能一當於場屋之役大科旣開與幼牧並登啟事庶幾盤洲厚齋伯仲之風予取諸書以呈臨川李公臨川驚喜曰不意近世尙有此人亟欲推挽之而臨川左遷不竟其志東甫兄弟亦並放還抵家不一年而遽卒後錢侍郎陳羣次對之際以東甫唐

書奏於

天子有 詔付書局時方令史館校勘唐書諸公得之大喜盡采之卷中東甫其亦稍暇目於重泉矣

詞科掌錄云沈東甫明太傅襄敏公六世孫爲陸德明張參之學者也廿一史四譜五十四卷一紀元二封爵三宰執四謚法汪謹堂學士序稱其體蓋出于表歷之流而變其旁行斜上者爲標日舉帝紀之要撮世家列傳載記之綱而類聚區分合於書志薈萃羣言之法其生平所致力於唐書尤深合鈔新舊之書爲二百六十卷除其重複補其漏遺最爲明備又以新書宰相世系表外譌特甚以孫爲子以弟爲兄甚則以甥舅爲父子合二氏爲一族爲訂譌十二卷附後其師

嘉善柯煜為之序又采掇唐詩中之麗字妍辭為金粉十卷
又云東甫有集二冊曾攜至京師卒卒未暇抄撮今不可得
見矣其少作在雙溪唱和集中難弟曰炳巽釋旃曰炳謙幼
牧皆工詩釋旃著有補正水經

陳曼生云東甫九經辨字排比鉤稽頗為細密可以因文字
之異同究訓詁之得失實有裨於經學唐書合鈔有綱有目
本紀列傳以舊唐為綱分注新書為目天文五行等志舊書
多漏畧以新書為綱分註舊唐為目一展而兩書燦然杭莖
浦嘗欲博采六典會要諸書訂得失以補其闕亦卒未能也

沈炳謙字幼牧號勞山浙江歸安人貢生由浙江總督程元章
薦舉

丙辰鴻詞之徵有兄弟並列薦牘者若湘鄉易公仙公申仁
和趙谷林意林錢唐金赤泉質甫王介眉步元及東甫幼牧
競爽齊名人皆以為盤洲厚齋之家風復見於今日一時傳
為佳話

詞科掌錄云沈幼牧東甫第六弟也少即工詩居竹墩羣從
倡酬極一時之盛上蔡程公總督浙江時與提學奉新帥先
生蘭皋雅志摛羅幼牧以五法九政說受知薦牘列名第五
在余與天台齊次風間余時有玉前盧後之謔其師嘉善柯
南陔方掌教太末寄詩有洛如花正為君開之句蓋深喜其
遇也後余與騶二太鴻扁舟過訪留止信宿時前輩輪翁先
生適里居觴詠不間日夕今所傳積照堂聽雨聯句其一也

幼牧罷歸童稚不戒於火堂爲煨燼累世遺書皆隨之盡難
兄東南又抱人琴之痛幼牧侘傺不自聊賴將遊歷四方以
抒其鬱鬱而迄無所合亦可悲已

劉世基字崧嶽江西贛縣人

一作會昌人

貢生由順天府府尹陳守

創薦舉

崧嶽擅詩才嘗宿半山寺有句云林深知寺近門靜覺僧閒
當時多稱之

陳黃中字和叔號介巖又號東莊江南長洲人生員由兵部尙
書江蘇巡撫高其倬薦舉著有宋史稿東莊遺集

東莊博綜史籍有經濟才歷遊幕府恥事十謁不得一試其
抱負歿後桑敦甫工部哭以詩云川巖正氣毓斯人節義文

章迴絕倫竹簡崢嶸揮直筆茅廬翫髀挺孤身晚爲孟博銜
幽憤死比黔婁守賤貧老淚還須沾葛屨豈惟德帳足悲辛
錢竹汀宋史稿跋云陳和叔宋史稟共二百十九卷其糾舊
史之失謂韓琦與陳升之玉珪同傳薰猶無別陳東歐陽澈
與宋季一僧一道士同傳儼不於倫康保裔戰敗降契丹官
節度使事見遼史而以冠忠義杜審琦卒于天成二年而以
冠外戚凌唐佐本紀旣書降金而又入忠義李穀竇貞固皆
五代遺臣入宋未嘗不應立傳皆確不可易於姦臣傳進史
彌遠嵩之而出曾布與鄒意合此稿增刪塗乙皆出和叔手
迹然前後義例未能畫一紀傳無論贊志無總序蓋猶未定
之稿較之柯氏新編當在伯仲之間耳

詞科掌錄云陳和叔父景雲少章有漢聖之目和叔能世其學而才藻過之

詞科餘話云和叔還吳卽入闈赴王中丞幕胡天遊有詩送之

蒲褐山房詩話云和叔爲少章先生子校讐考訂是其家傳而和叔少時卽留心史學頗以經濟自負常遊督撫幕府晚年歸家病宋史繁蕪如湯義仍王損仲屢有刪改皆未成書因將宋史紀傳表共改定一百七十卷但以未諳天文歷律故各志尙屬闕如歿後其槁本尙存於吳下藏書家詩不多作彭尺木收而刻之未爲完本卽予所見其在長沙作五言排律六麻一百韻則已失之矣

陸枚字實君江南吳縣人生員由詹事府詹事王奕清薦舉

實君擅雅材工詩詞同時俱爲欽挹 召試罷歸後以歲貢入成均終不得一見用於世

詞科掌錄云陸實君少遊京師與棠檢討泰查解元爲仁周秀才炎王孝廉霖結社賦詩甚有時名

胡鳴玉字廷佩號吟鷗江南青浦人廩生由兵部尙書江蘇巡撫高其倬薦舉著有訂譌雜錄

先生博綜多聞訂譌雜錄多取經史中字考其音訓以訂沿襲相用之譌網羅薈粹可謂勤矣長洲沈文慤爲作序盛稱之後以歲貢入成均詩亦清綺有訪友詩云喬木疏籬似畫圖數椽老屋向城隅隔林雨霽鳩呼婦近戶風輕燕引雛花

委藥闌紅欲盡草深蔬圃綠全蕪知君剩有鄆筒酒許我池
邊一醉無

蒲褐山房詩話云吟鷗博洽能詩雍正乙卯 詔舉鴻詞巡
撫高其倬學政張廷璐薦之 召試以疴疾發罷歸長洲沈
尙書德潛與同薦嘗集唐人句贈之云漢南詩老猶存社魯
國諸生半在門年八十三歿著訂訛雜錄考其出處辨其疑
似殊有益於學者

葉榮梓字孝常號容齋江南青浦人廩生由兵部尙書江蘇巡
撫高其倬薦舉著有紀季稟容齋詩藁

容齋詩才清雋揮灑自然性愛佳山水遊屐所至輒登臨題
詠集中訪古諸作俱饒秀逸之致

劉鳴鶴字臯聞江南陽湖人廩生由禮部侍郎江蘇學政張廷
璐薦舉

臯聞與文定同族沉潛經義尤精於易試罷尹文端公偕至
關中後 詔舉經學時文端總督陝西卽修薦牘上之

詞科掌錄云劉臯聞試後留京師館於畢禮部家後從尹大
司寇之川陝

程光祚原名默字啓生號蘇莊又號青溪江南上元人廩生由
安徽巡撫王紘薦舉著有大易擇言易通讀易管見易說辨正
春秋識小錄岫雲閣詩鈔

先生深於經學貫穿百家詣極精微於易詩書三禮魯論均
有撰述確然言其所言而無所依附嘗言口墨守宋學耳非

有墨守漢學者爲尤非務以深造自得爲主庚午吏部侍郎雅爾哈善復以涵養淳篤學問流貫尤能掣深易理應經學之薦惜終不遇

小倉山房文集云先生年十四作松賦七十餘言驚其長老弱冠舉茂才屢闕于有司遂棄科舉專治經一切星經地志樂律禮儀元元本本識其大者乾隆元年開鴻詞科十五年徵窮經耆老江南大府薦先生應詔雖兩如京師足絕公

卿門卒不遇乘奔棧歸余同試保和殿通數語已而官自

下相與爲忘年交後買山隨園所居宅相鄰益親每讀書疑必質先生先生有所作必袖來嗚呼今遺墨尙存先生不可復見而余亦將老矣弟嗣章有濟世才以經讓先生而專攻

史學人以比南朝劉瓛昆季良不媿云

詞科掌錄云程啓生春秋識小錄九卷凡三種曰職官考畧曰地名辨異曰左傳人名辨異其論晉軍政最詳又有賦頌五篇名曰目下新草

隨園詩話云丙辰秋 召試者同領月俸於戶部同鄉程廓

渠指一人笑曰此吾家娘子秀才也入學時初名默寓居金陵工詩今遁而窮經改名延祚以其間靜修潔故號程娘子因與數言而別讀其海澱園林一絕云隔岸迢遙 御路明

林間倒影見人行朝天多少步輪過添入山泉作水聲京中憶女云三齡幼女縈離夢一自能言未得看戲罷頗聞知記憶書來漸解問平安慰情欲比真男子努力應加遠客餐啼

笑更教聽隔舍茫茫愁思到更闌武林懷古云一自休兵國
怨除君王酣醉九重居雲開鳳嶺笙歌滿夢冷龍城驛路疏
海日忽驚宮漏盡春潮猶笑將壇虛誰知立馬吳中客不惜
千金買諫書詩甚蘇麗不作經生語後蘇撫雅公薦先生經
學卒報罷年七十七無子而卒著書盈尺俱付隨園

許鏘字 江南上元人生員由兵部侍郎署江蘇巡撫顧琮

薦舉

郭東字元城江南寶應人廩生由兵部侍郎署江蘇巡撫顧琮
薦舉

元城綜覽多才不屑鬼瑣之學屢試高等交遊所至唱和雜
揉詞致翩翩杭堇浦太史稱其甚負時名

胡二樂字象虛江南歙縣人廩生由都察院左副都御史陳世
倌薦舉乾隆丁卯舉人辛卯會試 特賜國子監學正

方辛元字廡州江南桐城人生員由總督倉場侍郎呂耀曾薦
舉

方氏自臯宗先生官水部以詩稱於時有述古堂稿沃園贈
公詩格清真拔俗漳浦蔡文勤謂其秀骨獨異清音自遠門
才日盛是科徵辟者三人南堂先生暨恪敏公俱不赴試而
先生以疎於經術斥之

李希稷字貽牟江南宣城人生員由安徽巡撫趙國麟薦舉

梅兆頤字恕漪江南宣城人生員由安徽巡撫趙國麟薦舉

詞科餘話云梅恕漪庚申長夏始得南還有留別胡泰舒兄

弟詩句云安定諸昆弟學各有深造交近四十年把臂輒傾
倒

鶴徵後錄卷第十

同里張士椿校

鶴徵後錄卷第十一

嘉興李富孫既涉甫輯

與試未用三十五人

汪臺字抱樸一字復園浙江仁和人廩生由內閣學士姚三辰
薦舉

抱樸工吟詠家有復園因以自號花石竹木頗饒幽趣旁構
城北水房同時厲樊榭杭堇浦周穆門施竹田諸宿老常相
過從刻燭分題為一時吟賞之盛嘗繪有亭角尋詩圖名流
都為題詠

王唐徵復園記云復園舊名北園於會城諸園為最曠地接
闡闢去埃氛甚遠歲己未秋主人汪君抱樸觴客於園之先

春亭余交君最晚今始得過其地爲之淹回瞻矚若不能以
舍去君喟然謂余曰子第見吾今之園之差足自適抑未觀
昔之園之所爲盛乎自吾先大父之構此地凡六十餘畝其
間爲層樓飛閣花臺月榭窈窕洞殆不可僕數而卉木狎
獵不止數千本身世多故事有不可言吾先君歷官中外旣
弗克恬居是園者亦展轉易主尺寸舉不爲吾有傾陲蕩析
往跡幾於堙盡及吾之身自幼至壯口經陟道路迨倦而旋
歸且無以寄吾足於是量吾恒產之所入筆墨之所獲自婚
嫁薪米雜費外重自節嗇以留其餘而漸復夫故一切高下
可喜之觀尙未能以得半而吾力則已殫矣余聞而瞿然因
以賢君之志書其言於園之左壁

詞科掌錄云汪抱樸婦翁湯少宰西厓以詩名海內得其家
法絕句特工

隨園詩話云乾隆初杭州詩酒之會最盛名士杭屬之外則
有朱鹿田吳臞亭汪抱樸金江聲張鷺洲施竹田周穆門每
到西湖隄上摘裳聯襪若屏風然有明中讓山兩詩僧留宿
古寺詩成傳鈔紙價爲貴南屏坐雨宋云一角山昏秋欲晚
滿窗夜戰雨來初汪云雲氣半遮山下塔秋光早入水邊村
施云濃雲擁樹湖先暝涼雨到窗山欲磨張云荷聲冷帶跳
珠雨鐸語遙飛潑墨山皆可愛也

盧存心原名琨字敬甫號玉巖浙江錢唐人廩生由都察院左
副都御史陳世倌薦舉著有白雲詩集

先生居貧力學經史百家靡不綜貫嘗私淑勞餘山立行不苟外舅馮山公景以文章著先生深得其淵源尤豪於詩逢興會落紙颯颯如飛後以歲貢入成均子文昭歷官侍講學士能昌明家學先生有示子詩一千五十言云外祖馮山公文章驚在宥衣鉢無後人瓣香落汝手

桑欵甫白雲集序云予生平兄事友二人一盧敬甫一朱子齋敬甫才奇橫倚馬萬言老賣文爲人作充物不返顧其自作亦散失今所存者如干其弱冠作勸行篇足比昌黎原道爲宇宙有數文字又壽序云予兄事無多人惟敬甫交最篤亦最先自總角坐同席吟同研出入早晚必俱居東苑中嬉遊嘯歌之地形影無一日離里之婦孺所稱爲雙先生者也

長俱有室以貧出授經謀養分合無常然猶歲時伏臘兩家往還若織旣而予走軟紅奔波世途絆羈浮名僕僕無寧歲洎請急歸而髮之鬢者已半素始一意匿影衡廬與敬甫追兒時歡如故顧或仍以衣食牽往東西不獲恒聚當予出遊時累敬甫送別寄懷悵惘疊而敬甫性落拓早無意干進雖踏場屋汎汎如萍浮江湖見有樓泊處所了不繫著曾一對大科至京師尋浩然歸其數間之草堂著書哦詩以舒放其天中間哀樂頻經晚益貧能不累心益用廓廓無纖芥於其胸偶覓得杖頭輒借所善買郭西小舟汎蒔香柳陰之間酣呼笑謔不知日之已夕烹魚湖樓沽酒姥肆遭雨借青簪笠過段橋迤邐入城闕見之者以爲神仙昨秋余因故人招

入大梁客居岑寂屢書邀敬甫將同登吹臺之上嗣慷慨懷古之遺踪敬甫有以自樂莫肯來也

隨園詩話云詩用經書成語有對仗極妙者前輩盧玉巖云頭旣責余余責頭腹亦負公公負腹近人吳文溥云人非磨墨磨人我自註經經註我姚念慈云野無青草霜飛候菊有黃花雁到初汪韓門云白鳧化後成衰老黃雀飛來謝少年胡穉威云春水綠波芳草色雜花生樹亂鶯飛朱鹿田得子云我求壯艾三年藥汝似玉瓜五月生皆用經書樂府成語也

汪沈字師李一字西顥號槐塘浙江錢唐人生員由浙江總督程元章薦舉著有小眠齋橐籥西紀遊集沾上題襟集槐塘詩

文集

先生博覽載籍沈敏多才所至名公卿無不傾倒嘗分修浙江通志及西湖志鴻詞報罷客天津查氏大學士史公貽直欲薦舉經學以母老辭自津門歸轉客閩中新將軍幕府爲撰福州八旗志後復之京之武昌屢爲諸侯上客草檄飛書倚馬立就樊謝贈詩云舉瓊書好才稱捷橫槩詩成氣自雄性伉直不阿有不當意輒拂衣而去平生好求有用之學自農田水利邊防軍政沿革利病所在靡不綜貫晚年自定撰著有湛華軒雜錄小眠齋讀書日札全閩採風錄蒙古氏族畧新安紀程識小錄泉亭瑣事汪氏文獻錄諸書

詞科掌錄云汪西顥少從樊榭厲君學得其詩法文辭清豔

博極羣書上蔡公補試全浙之士以

景陵瑞芝賦春雪詩評二十一史浙江通志序受知罷後客津

門查氏賓主留連極文酒之樂守令聘修郡縣志乘采其風

士謠俗為雜事詩百首

杭堇浦津門雜事詩序云吾友汪君西顥滯淫是邦載離寒

暑有南湖賢令君以為之囊橐而蒐討有藉有水西查氏以

恣其遊息而酬倡不孤參稽地乘溢為聲詩意主於揚厲風

騷表章士女正習俗之訛著土風之異蓋以詩傳事非以事

為詩也夫山川寂寥城邑隱賑攬奇紀遊之什大抵詳南而

畧於北津門地非阻僻當前修既往墜簡就湮之會其緒積

數百年而未出西顥一客卿耳一旦抽妍騁秘抉發之而無

所餘豈非談藝者之權輿省方者之惇史乎

隨園詩話云李敏達公撫浙時威不可犯獨能敬讀書人設

志局修書所延皆一時名士公餘之暇放艇西湖屢開文讌

汪西顥賦詩云西湖大好作春遊環佩如雲簇水頭誰似向

書能愛士日斜隄外未回舟其時余才九歲後五十年西顥

在莊相國席上見贈云花卮同泛小山堂回首星霜三載強

野叟尙能夸舊政羣公每見譽文章君卿老去言逾妙陶令

歸來樂未央莫道隨園秋色淡蒼庭日月閉門長與余在席

上論元次山文有惡圓一篇余道天體尙圓何可見惡西顥

因指身上衣襲冠領席上盤碗壺碟曰諸物皆圓才適於用

彼此大笑

孫詒年字穀仁號壽門浙江歸安人生員由浙江總督程元章薦舉

壽門爲少司空在豐之孫稟承家學博雅多聞詩亦清婉可誦辛未南巡召試復不獲預選

沈冰壺字心玉號梅史浙江山陰人廩生由太僕寺卿蔣漣薦舉著有古調自彈抗言在晉等集

梅史熟於子史能抒已見然論議不免涉於偏僻如詠古一卷指事論情純駁間出其欲以莊子配易管子配書荀子配禮老子配論語皆似有意示奇本朝阮亭竹垞堯峯湛園諸公詩文無不爲其指摘者

周元牧鴻爪錄云心玉頗涉獵書傳詩雖多非所工也嘗

擬古樂府一卷彙主事故甫攜入都以是知名得膺薦擢及廷試最後納卷被斥落或言其史論中欲黜蜀帝魏及進金元而黜南宋當事惡其偏謬故也

越風云梅史性孤附於時寡所合常有古人不見我之恨喜博覽家貧無書恒借披閱有得卽見諸筆墨經史最所窮究更熟勝國諸老賦事詩不規規講求音韻采色而善於持論觀其詠史樂府可見一斑

隨園詩話云心玉古調獨彈集以新樂府論古事極有見解如辨永王璘非反李白受誣作夜郎行雪李贊皇之非黨作崖州行笑隋主誅宇文身死於宇文作南氏怨以何平叔之不父曹瞞爲孝不從司馬爲忠其粉白不離手之說卽梁冀

誣李固之胡粉飾貌也人言崔浩毀佛遭禍乃詠崔浩云仙不能救佛豈能阨尤爲超脫

周炎字西序號青瑤浙江蕭山人生員由浙江總督程元章薦舉著有幽思草可耕堂集

青瑤少卽能詩弱冠登岱云帝座仰窺纔尺五黃河下視直三千氣象甚偉咸以遠大期之然竟不遇以諸生終

詞科掌錄云周青瑤賦性溫茂淵懷若不及古文刻厲精粹似孫可之

詞科餘話云周西序貧居奉母畫護壽圖乞言宗人玉章有詩送其南歸

鳧亭詩話云西序詩詞爲一邑之冠四十年前寶意商君爲鎮江司馬時有越郡舒華之選託余徵詩余與西序世誼交最善因錄其詩二十餘首郵寄之其題西施廟云誓死未酬亡國恨偷生肯上五湖船秋園云秋林無靜葉寒水有沈魚又如曉行云馬馱殘夢過江東法相寺云山深寒月凍琉璃皆佳句也舒華之選今改名越風粹以行世而所載西序詩不及諸作豈久而遺其橐耶然則越詩之佳者越風之所遺亦多矣

陳繩字駒季福建閩縣人陳生由福建巡撫盧倬薦舉

詞科掌錄云陳駒季奉天盧公所薦中允黃之雋石牧督學閩中時有國士之目

陳繼善字敬堂福建閩縣人生員由福建巡撫盧倬薦舉

方鶴鳴字  福建晉江人廩生由福建巡撫盧倬薦舉

王元芳字鼎汝福建晉江人生員由福建巡撫盧倬薦舉

陳大炎字  福建龍巖人廩生由福建巡撫盧倬薦舉

傅涵字聖涯江西臨川人廩生由戶部侍郎李紱薦舉著有新

橋集

聖涯學問淹貫為穆堂侍郎所重嘗由維揚至姑蘇道中晚

晴有詩句云屋多籠雨亂山遠積雲平

張錦傳字與輝江西臨川人生員由江西巡撫常安薦舉

與輝性質直學問淹通己巳江西巡撫阿公思哈復以經學

保薦

詞科掌錄云張與輝滿洲常公所薦同里李進士紱南園雜

著中載其文謙賦一篇

廖理字  江西南城人廩生由江西巡撫常安薦舉

陳洪淡字  江西高安人廩生由刑部侍郎王紱薦舉

盛樂字水賓號劍山江西武寧人生員由刑部侍郎王紱薦舉

著有劍山集

劍山為教授際斯季子與兄讓鏡並以詩文名人稱三盛先

生劍山學尤淵邃詩格高夙不蹈宋人蹊徑嘗有歲暮懷人

詩三十首一為諷誦真自序所云遠望可以當歸悲歌可以

當泣者矣

江西詩徵云劍山七歲能詩十一通經史以貢生應舉不第

歸慨以著述自任南昌楊子載屋武寧汪輦雲軻皆師之

鄧獻璋字方侯湖南祁陽人廩生由湖南巡撫鍾保薦舉

方侯淹雅擅詩詞不屑屑於章句之學詞科報罷留京師後

直 武英殿甚有時譽

陳世賢字  湖南祁陽人生員由湖南巡撫鍾保薦舉

解合章字  陝西韓城人廩生由陝西巡撫碩色薦舉

田荃字荃生陝西富平人廩生由戶部尙書總理陝西巡撫史

貽直薦舉

李天生先生爲田氏外孫先生無子歿後遺著多散佚荃生

世父少華大令爲梓其壽祺堂詩集賴以僅傳

秦涇字幼湜陝西郃陽人生員由陝西巡撫碩色薦舉

幼湜布素樸學爲關中所推重試罷胡稚威送其歸郃陽詩

云相士常苦衣相馬常苦肥古來豈不然勿謂今更非秦士

焚舟來超乘爭騰希自許一戰霸空振干鈞機仍將片葉身

遠向瀟岸歸瀟陵夜半雪南山奪光輝句芒遲遲春倉庚鳴

不違浮雲浩茫茫安知所從依謾謾秋樹林下有雙石扉逸

竹閱青火亦足忘寒饑矣勿嘆嗟各自從風飛

詞科餘話云秦幼湜年五十餘古詩樸老疎硬似其爲人攜

其子詒謀徒步二千里入京臥病空館不堪其苦同人稍醖

金資之去

周汝舟字道夫江南吳江人監生由內閣學士吳家驥薦舉著

有悅汀詩稿

道夫爲明太僕忠毅公宗建元孫明經龍藻子稟承家學具

有根柢以府庠生入國子監詩意和平不入險怪迂僻之徑
陳受之松陵詩話云 本朝鴻詞一科為千古曠典而吾邑
人材特盛康熙中稼堂虹亭並以布衣入翰苑乾隆元年
詔舉鴻博邑中如沈冠雲王載揚廷耕石吳萬長陸元芻周
道夫或祖述風騷或湛深經術雖遇不逮潘徐而學問文章
今人亦未可薄也

張範字勤旃江南華亭人監生由衍聖公薦舉

葉承點字子異江南奉賢人監生由刑部侍郎勵宗萬薦舉

子異被薦入都與吾鄉錢文端公投契時往來酬和香樹齋
集中有燈花聯句四十韻極勁峭有致

錢斌字 江南太倉人監生由湖南巡撫鍾保薦舉

商邱宋漫堂巡撫江蘇訂吳風一編時若杜紫綸吳荆山諸
公皆錄其詩文先生有寄題三高祠五言占一首詞致清綺
其蜚聲壇坫有素矣

吳溶字 江南陽湖人監生由工部侍郎王鈞薦舉

劉師翱字 江南寶應人監生由兵部侍郎署江蘇巡撫顧

琮薦舉

任瑗字恕菴號東澗江南山陽人監生由兵部尚書兩江總督
趙宏恩薦舉著有纂註朱子文類論語中庸困知錄易學象數
傳心錄太極圖說析疑通書測讀經管見小泉筆記困學恐聞
正經說傳習錄辨知言劄記讀史衡說史記論文史記筆譚六
溪山房文彙小泉集六有軒存稿詩漫鈔

東澗系出先賢任城伯講求理學博極經世之務嘗佐父延
平公平順昌寇興舉淮安水利俱有成數年八十餘方遭疾
猶對客劇譚以淮陽水患爲憂閏三日河大溢其識議有過
人者

顧震滄六有軒集序云吾友東澗任君資穎異弱冠卽發四
部下筆攻苦尤穿穴宋五子之書著述等身顧不甚喜作文
間一爲之冥心孤詣超軼絕倫非韓柳歐蘇之文而自成爲
任子之文也大臣有知之者公薦于朝 召試保和殿歸
來放浪山水泊如也予謂東澗之爲人不必以文重而此一
卷又不足以盡東澗之文雖然一鱗一甲而知應龍之神一
嘖一笑而知夷光之美然則謂此不足以測東澗之文者非
方隅之見與

劉寓槎云東澗弱冠卽棄舉業以倡明正學爲已任高安朱
文端公器重之一時學者稱爲東澗先生所著書甚富皆潛
而未出

趙信字意林浙江仁和人監生由通政司使趙之垣薦舉著有
醯畧秀硯齋吟藁

意林與兄谷林清才淵雅並擅詩名意林嘗與梁文莊公相
倡和編有同林唱和集詣極超雋裒裒倡歎有儵然意遠之
致

李穆堂送意林序云余蒙 恩以久廢起用官戶部與仁和
趙公同爲侍郎其從弟意林來謁投南宋雜事詩七卷同賦

者七人人賦百首而意林與其兄谷林並在焉詩七百首隸事至三千餘條其學可謂博而辭亦可謂鴻矣亟欲舉意林應詔意林顧辭讓謂公誠有意願舉吾兄賢哉讓乎世人急名利小得失走若鶩博學鴻詞大名也中郎官清華大利也獨以讓兄豈易得哉余未識谷林止見其詩然能致其弟敬讓則其能友愛可知二趙子詩筆如彼學問固優贍而人品豈不亦端純哉因舉谷林以成意林之意而意林旋亦被舉明年二趙子並報罷未幾意林來告歸願得贈言余謂博學鴻詞以實不以名有其實雖不中猶中也韓文公三試於吏部卒無成然唐之中是科者其學與詞未嘗敢加於韓公子歸益勉其學充其詞不遇固無害况無不遇乎

詞科掌錄云趙意林與兄功千齊名稱二林功千又字谷林也

詞科餘話云予與谷林兄弟過從尤密溫經研賦未嘗不借館子穀子惟予所取求故諸徵士錄別皆作數日之惡唯意林獨黯然銷魂也

段梧生字 湖南長寧人監生由湖南巡撫鍾保薦舉

王元字 湖南華容人監生由湖南巡撫鍾保薦舉

南昌齡字念貽湖北蘄水人監生由兵部侍郎署湖北巡撫吳應棻薦舉

念貽見聞博瞻詩格雋上吾鄉萬孝廉循初有題其行卷後云軼事津津述晉唐春松秋菊各分行他年翦割成圖障好

句寧翰李十郎

許儒龍字士元四川郫縣人廩監生由四川巡撫楊勳薦舉詞科掌錄云許士元壻父楊丹山爲福建運使士元往遊因依焉時陳進才兆崙方觀政閩疆相得甚歡倡酬最多丹山名宏緒新繁人辛丑進士後爲浙江按察有風力亦能詩張庚字浦山號瓜田逸史晚又號彌伽居士浙江秀水人布衣由翰林院檢討湖北學政蔣蔚薦舉著有五經臆通鑑綱目釋地糾繆補注畫徵錄續錄蜀南紀行畧短檠瑣記強恕齋詩文集瓜田詞

先生家素貧少孤事祖母及母盡孝不樂爲科舉業性嗜書及詩錢南樓太夫人爲先生表姑與講明六法大有悟遂爲納婦于南樓之下年二十七授徒吳江研究注疏史漢及唐宋大家之集後入江西志局與諸名士相倡和歷遊魯燕梁楚丙辰試罷歸復佐蔣檢討校士於蜀雖未嘗爲科舉文而能因文決人之福澤後皆不爽先生文簡老樸實詩亦新穎山水入董巨倪黃之室而能自成一時罕有及者

桑菽甫瓜田集序云吾執友張君瓜田少孤露母夫人教之義方學成爲君子儒以負米奔走四方足跡半天下不金紫是豔而營潔白之養衣布以終身曾一對大科放還山所至人傾心尊奉求爲碑板之文時時詠歌其志往來贈答穆如清風長途跋涉遇嶄巖險峻濤瀾奔煙雲變態百出勞者之歌加以江山之助益發其光怪陸離之藻思不可方物如

入蜀詩雖老杜亦不避其旌竿卓成一家之則其騁妍抽祕一出於孝弟忠信之根源肫摯醲郁使人抹涕輸忱激發於善而莫敢萌非僻之心其哭母也嗚嗚若孺子啼灑血於爛煤破楮號聲嗚悲年既髦而不輟痛誠蓼莪之續也餘事工於六法有史裁春秋經傳地里攷其疆索而正厥謬訛並刻有成書經臆一帙鏗鏗道古他古文詞詩賦及倚聲滙爲全集其門人濟陽令胡君德琳爲授之剞劂予與君定交在中州客舍亡兒繩篋亦時承長者教誨今故人已逝吾無以爲質而西河之戚猶振觸於遺編傷老成之凋枯感大雅之零落青燈揜燄不自知老淚之泔泔也

魯克恭文集云瓜田五古原於三謝流衍於曹陸左鮑三張七古則遠宗浣花近禰北地五律多以古運七律純以氣行不軌一家也

詞科餘話云張浦山以古調自鳴不工律體試日棄去復就湖北蔣學使幕萬循初有詩送之句云山人好詠詩作古不作律所法魏以前作五不作七又云含精茹英數十年溢爲畫法尤清妍荆關董巨路久絕山人尙欲躋其巔金馬門開來俊彥白衣獻賦 明光殿羊角風高未得搏依然歸抱紅絲硯卽今重泛楚江雲仍是天涯瀟灑人東華軟塵高百尺誰能居我山人輪

蒲褐山房詩話云浦山工於山水世多以翰墨稱之不知學問淹博如釋地糾繆補注極爲精審古文簡樸五七言古體

詩頗見古人堂奧丙子丁丑間君來往廣陵常同尊酒盡讀所著書故得悉其深造

李引樹云先生肆力於詩古文兼精繪事晚益研求元四家山水氣韻深厚幾及麓臺先生女孫適崔爲余外母嘗言先生性孤峭有知已索畫丈幅立就每自矜許否則寸縑尺紙不以予人後客睢陽十餘年人重其學生平遊歷公卿間多與賢豪長者交嘗主吳興李太守李署其室曰浦來軒其爲時所推如此

趙寧靜字方白號藜村江西南豐人布衣由兵部侍郎鎮國將軍宗室德沛薦舉

已未鴻詞布衣與選者五人馮檢討勗名不甚著故當時只有四布衣之稱其膺薦而未與選者尙有十一人是科布衣僅五人與試三人均未中選人亦多以四布衣稱未得其實也

詞科掌錄云趙方白江西撫臣欲薦之不果宗室德公薦於


朝出爲浙閩總督攜入幕


隨園詩話云丙子九月余患暑瘧性命在呼吸間忽有同徵友趙藜村來訪家人以疾辭曰我解醫理乃延入診視命速買石膏及他藥投之飲未半盃沈沈睡去須臾醒君猶在坐問思西瓜否卽命買瓜曰憑君盡量我去矣食片許如醍醐灌頂頭目爲輕晚便食粥未幾君歸余送行詩云當時同日賦長楊廿載賓鴻過草堂白下秋燈明舊雨青山花影澹重

陽元方齒長居兄輩中壘才多解祕方剛是仲宣愁體弱苦
教秤藥累真長已將仙露挹靈苗便引晨風去碧霄活我只
因緣有舊離君轉恐病難消秋深古道詩逾健霜滿黃河浪
不驕倘拜東平憲王墓爲言故吏鬢飄蕭藜村故簡
親王容先生亦
見贈云同試 明光人有幾一時公翰髯先斑又云藜村雞
鳴埭訪友云佳辰結良覲言采北山杜雞鳴古埭在登臨渾
漫與蕭梁此化城貽爲初地祖六龍行幸過金碧現如許欲
辨六朝踪風亂塔鈴語江南山色佳元武湖澗澈豁開几益
間秀出庭木末延陵敦夙尙藉以紆蘊結山能使人澹湖能
使人濶聊共發嘯吟無爲慕禪悅

鶴徵後錄卷十一

從弟啟孫校





鶴徵後錄卷第十二

嘉興李富孫既汴甫輯

雜綴

方望溪文集云雍正八年議開博學鴻辭科 詔閣部院司府
寺三品以上暨直省督撫舉臣舉學與行兼者諸公多叩余以
所舉余應之曰稱此者實難而辨所應舉則易夫行必有迹學
與辭尤藝之外祿而與衆共之者非若德蘊於心或深潛而不
易識也然必鄉國莫不知天下莫不聞然後舉者無忤在人
不疑是則匪易耳

詞科掌錄云 明詔既下首訖凡四年合內外所舉凡二百六
十七人重薦者六人

錢蔞石詩集注云乾隆丙辰 詔舉博學鴻詞先後舉者二百六十七人滿洲五漢軍二直隸三奉天一江蘇七十八安徽十九浙江六十八江西三十六湖北六湖南十三福建十二河南五山東四山西三廣東六陝西四四川一雲南一詞科餘話云甲寅九月總督士蔡程公合試全浙之士題有河清海宴頌仁和處士吳頴芳擬作極王歸安沈炳謙以後到補試題有九法五政論蓋初學記偶儷牽合之辭榜後試帖盛行仁和孫之騷子駿向任慶元教諭家居著述其松源經說中亦有一論似攻擊沈君而作者然風檐應試之作未可與暇日獭祭者同論也又云丙辰夏大學士無錫嵇公署浙江總督復試多士於院署有春秋三傳異同說余小友仁和趙一清誠夫最為詳盡竟遺斥落

沈文憲公年譜云雍正十二年 詔舉博學鴻詞縣令沈諱光曾以札幣來聘予以學術淺陋辭文宗召往堅命應 詔五月督撫學三院考試題係 硃批

上諭頌時雨賦一實萬分論三才萬象共端倪長律十二韻與試三十一人取六人予名第三第一孫見龍癸巳會元第二孫天寅舉人第四倪承茂第五吳龍見第六朱厚章期明年具題赴京十三年四月子偕同郡倪稼成武進吳恂士入都定寓後日課古學四方名流時會合不荒正業也八月薦舉諸生許應北闈試予循例入場不遇十二月移寓彭芝庭宮允家家菜園名廷芳來受業乾隆元年仍日課古學八月應北闈試不遇九

月

御試保和殿五六天地之中合賦山雞舞鏡詩七言長律十二韻黃鍾萬事根本論二場經解一史論一閱卷者鄂文端爾泰張文和廷玉二相公少宰邵基取一等五人二等十人菜園姪中二等子失寫題中字以不合格不遇同稼咸歸到家雖失意歸歌吟嘯呼無戚戚容也

王礪齋十四日兒年譜云雍正乙卯

詔徵博學鴻詞循康熙

己未科故事也外則直省督撫得舉薦晉撫石公以余名應先是方伯溫公觀風通省余擬卷呈送蒙獎賞詞科之薦以此四月離興縣任入京候試前己未文恭被徵入選時祖孫先後得與制科者余與朱稻孫兩人朱則竹垞先生孫也乾隆丙辰元

年九月

御試諸徵士於保和殿第一場賦詩論各一第二場經史論各一命大學士鄂張兩相國少宰邵公基閱卷取十五卷進呈不得與舊例外吏不入選仍回原任余以加捐主事當在部候選十一月歸張溪康熙己未文恭公以太常寺博士徵試列一等六名閱六十二年祖庚復與是科之薦雖未入選而得偕海內諸名宿奏藝闕廷何其幸也

劉海峯文集云雍正十一年

天子有意久道人文之化肇開博學鴻詞之科命王公巨卿暨督撫諸路州縣羣有司悉心延訪萃九州之衆積四年之久內外臣工共所推薦得二百餘人而余幸與其選

詞科餘話云前己未時四布衣名動

余幸與其

天子今時所舉亦有布衣四人南豐趙寧靜余未知其人秀水張庚西安申甫詩皆清古可味蒲城屈復則年近七十尙事塗抹如三五少年時去古遠矣夫布衣之名爲不耕而食者所易託一介之士操觚率爾輒動

聖主之旁求其不得恕律之審矣

袁簡齋小倉山房集云丙辰同一百九十三人試博學鴻詞於

保和殿下時班中無弱冠者諸王公都來疑年口號以對襖

衫青入九重天岳牧科慚員半千末坐竟陪燒尾宴遲來猶

領大官錢

時鴻博未試者俱恩給月俸

書完黃紙三千牘身到紅塵二十年

家是南朝舊臨汝敢將才語向人傳

詞科餘話云兩中堂意以保舉多有濫觴取額遂隘其實亦冰遺珠不關離珠象罔也九月後諸徵士皆返故園不能盡讀其所著朋好閒閒有挾跡者輒錄數家

李穆堂類稿云雍正十有一年

世宗皇帝特詔開博學鴻詞之科令在京三品以上大臣在外

總督巡撫會同學臣薦舉人品端純學問優贍者應試蓋自康

熙己未召試距今垂六十年矣事嚴典曠中外相顧莫敢先

發逾年河東督臣舉一人直隸舉二人他猶莫有舉者

特旨切責諸臣觀望又踰年太學士高安朱公舉四人而封疆

大吏所舉猶趨趨不前

今上登極再詔督促明年天下所舉士集闕下者百八十

餘人

天子臨軒親試之執事者猶持嚴重之意僅以十五卷上御覽蓋取數隘視己未四之一耳己未三取一人而今十不能得一也

隨園詩話云乾隆丙辰召試博學鴻詞海內薦者二百餘人至九月而試內殿者一百八十八人出雞舞鏡詩劉文定公有句云可能對語便關關

上深嘉獎親拔爲第一遂以編修致身宰相二百人中年最高者萬九沙先生諱經最少者爲枚全謝山庶常作公車徵士錄以先生居首枚署尾己亥枚還杭州先生少子名福者持先生小像索詩余題一律有當年丹詔召耆英驥尾龍頭記得清

之句詩載集中

塵定軒譚粹云己未詞科仁和沈開平筠上海錢越江金甫既同中己未進士三月召試授編修五月復選庶吉士當時以爲榮是科相國某特奏凡經保舉而已成進士入詞林者不必再與鴻博之試檜門謝山諸先生皆不復入試故是舉無兩廡詞林之選者

沈萊園隱拙齋詩集注云乾隆元年考取詞科諸臣甲等五人俱授編修乙等十人內五人以科甲出身授檢討五人以諸生改庶吉士踰年散館

御試時臣士鎧臣廷芳皆拔置甲等奉旨授編修實異數也

諸草廬絳附閣詩稿云乾隆丙辰十月初五日以博學鴻詞科
劉綸等一十五人引見授職有差

欽賜口知舊說各一帙是日殿中引見之時雙鵲噪殿脊良久

夏醴谷半舫齋詩注云自康熙已未試博學鴻詞距今垂六十

載時與試者月給膏火費故事給札體仁閣下

上以雪後特命保和殿考試題皆

御筆硃書試卷進呈

欽定甲乙等十有五人十月五日養心殿引入見

天顏温霽獎厲有加是日同授職翰林有差

詞科掌錄云雍正十一年詔舉鴻博至乾隆元年丙辰合內

外所舉凡二百七十六人試授館職者十五人一等五名二等

十名武進劉綸為之冠二年丁巳補試鴻博復得萬松齡等四

人此條見槐廳載筆檢詞科掌錄並無

詞科餘詁云華亭張司寇照時失職閒居奉命書十五人試

卷

隱拙齋文鈔云制舉之行助於漢而以名其科則昉於唐唐選

舉志稱天子自詔者曰制舉所以待非常之才是也顧唐時制

舉其名隨時更易所謂博學鴻詞者開元中嘗舉之與賢良方

正直言極諫博通墳典辭藻宏麗才識兼茂諸目俱稱制科宋

世猶沿其法而專以博學鴻詞各科則自紹興中始得人之盛

前史亦班班可稽矣我朝文教昌明超越往古康熙己未歲

聖祖仁皇帝特開是科擢五十人入翰林時稱極盛又五十餘

年

世宗憲皇帝復詔中外大臣悉心蒐訪薦於朝廷今

天子御極多士雲集闕下乃以乾隆丙辰九月試於保和

殿拔十五人明年秋續試其後至者拔四人俱置詞館蓋曠世

之典非唐宋時閒歲一舉士子先期投牒有司臨時奏名者可

同日而語也廷芳學殖弁陋倖獲別名嘗考前代有諱行錄同

歲名諸書卽今春秋二試所編齒錄也畧倣其例首登

詔旨次錄試題及甲乙等第後列同籍諸君之姓氏里居世系

舉主而詳書之合爲一集名曰詞科同年錄夫科名之重重以

人也漢自晁董以還其可並者曾不數人唐宋中制科者尤衆

至今赫赫在人耳目國朝己未科有湯文正之正己化物李

天生之孝誼純備喬石林之正言去國施愚山之學行醇雅手

西河朱竹垞徐花隱之間學淹洽汪鈍翁陳迦陵潘稼堂李石

臺之才藻炳煥之數公者實堪追配古人故足重也預是科者

可不思共勉以答知遇哉

先從祖敬堂隨筆云乾隆元年薦舉諸公到京已百餘人詔

許每人月給銀四兩御史吳元安奏准分二場考試首場經史

發難覘其抱負越日次場詩賦論應制觀其詞藻並准給燭九

月廿六日保和殿考試一百七十六員廿八日二場閱卷爲

鄂張兩相國邵少宰基十月初三日奏名

欽取一等五人授編修二等十人由科甲出身授檢討未中舉

人者庶吉士初五日引見初六日授職二年七月十一日續

考方天游等二十六人閱卷者張文和廷玉孫文定嘉淦中元日 奏名

欽取一等一名二等三名本日授職 詔不必引 見次年散

館楊度在改知縣程恂改知州陳士璠改部主事齊召南漢字

二等十名授檢討沈廷芳一等十名授編修汪士鋁漢字一等

九名授編修四年散館洪世澤二等 名授檢討朱荃一等十

一名授編修

戴蕞塘藤陰雜記云乾隆丙辰考試鴻博一百九十三人年長

萬經癸未進士年少袁枚廩生取入翰林十五人亦見館選錄

不取而後登顯仕者沈尙書德潛王少司馬會汾襄大司空曰

修錢少宗伯戴葉庶子西楊學士述曾金總憲德瑛曹大宗伯



秀先以春榜已入翰林不與試全祖望撰公車徵士小錄今惟

袁隨園存

鶴徵後錄卷第十二

姪仲淳校





雀巢後全卷十二



71020791

